

41. Obj. II. Amor, quo S. Paulus Philipp. 1. v. 23. cupiebat dissolvi et esse cum Christo, erat amor perfectae caritatis: atqui amor ille includebat motivum propriæ felicitatis: unio enim cum Christo necessario supponit et objectum quod diligitur, et subjectum quod diligit; ergo ex motivo spei actus perfectæ caritatis et contritionis potest concipi.

R. N. min. cuius prob. D. Unio cum Christo supponit objectum seu Deum qui diligitur propter summam suam perfectionem in se absolute consideratam C. propter suam bonitatem spectatam relative ad nostram beatitudinem N. Explicatio ista petitur ex S. Augustino, qui L. 3. de doctrina Christiana c. 10. n. 16. ait: *Charitatem voco motum animi ad fruendum Deo propter seipsum, et se atque proximo propter Deum.* Cum quis amat beatitudinem tanquam bonum sibi, ita ut beatitudo sit proxima ratio amandi tale bonum, est amor proprius concupiscentiae, specie alius ab amore caritatis. Quando autem quis sibi amat beatitudinem immediate et proxime propter gloriam Dei, ut hunc tanquam amicum presentem habeat, ac de bonis ejus gaudeat, amor iste, licet materialiter possit denominari concupiscentiae ob beatitudinem, quam quis sibi amat, formaliter tamen et quoad motivum est amor amicitiae: cuiusmodi erat desiderium Pauli ad Philip. 1. v. 23. Ita Suar. L. 2. de necessit. grat. c. 13. n. 23.

Inst. 1. Deus per caritatem diligitur ut beneficus et beatificus: atqui non potest ita diligi sine respectu ad bonum quod ex ipso speramus; ergo sine motivo spei caritas non elicetur.

R. D. M. Deus per caritatem diligitur, ut beneficus ratione principii C. ratione termini N. Diligitur Deus ens a se, principium omnium perfectionum, inter quas continentur etiam benignitas et ratio finis ultimi seu beatitudo objectiva: quamvis beneficia in nos derivanda, item possessio et fruitio summi boni, qui sunt termini divinæ benignitatis, ac Deitatis beatificantis, a caritate directe non spectentur. Secundum hactenus dicta accipi debet, quod S. Thomas 1. 2. q. 63. a. 5. ad 1. et q. 114. a. 4. scribit, caritatem esse amorem Dei, quo diligitur ut beatitudinis objectum: nimirum ratione summae suæ perfectionis, ob quam non solum est principium omnium rerum, sed etiam illarum finis et beatitas.

Inst. 2. Non potest homo se exuere desiderio naturali, quo in beatitudinem fertur; ergo desiderium istud in omnem caritatis actum se insinuat.

R. D. Ant. Non potest se homo exuere desiderio, quo in beatitudinem fertur vel formaliter, explicite, vel virtualiter tantum, implicite, materialiter ac præsuppositive C. quo in beatitudinem semper feratur formaliter et explicite, quasi actus quilibet sit formale beatitudinis desiderium N. In actibus liberis mentem a beatitudine ita avocare possumus, ut non formaliter propter hanc, sed propter absolutam objecti excellentiam operemur. Quoniam autem innatum nobis est erga beatitudinem generatim desiderium, hoc ipsum semper virtualiter, materialiter vel præsuppositive nobis inest, etiam quando ex caritate purissima agimus: qua quidem caritas desiderium beatitatis adeo non rejicit, ut illud una cum spe etiam imperet. Nam et amor quo in Deum ut nobis bonum ferimur, castus, purus et gratuitus dici meretur intuitu amoris mercenarii, quo Deum ob temporalia bona diligimus; non vero caritati perfectæ comparatus, etsi simpliciter sit castus et purus hoc sensu, quod bonus, honestus, necessarius et supernaturalis sit,

Distinctione data explicanda sunt, quæ S. Bernardus epist. ad Guigonem n. 8. (opp. t. 1. p. 31. edit. Mabill.) de quarto amoris gradu disserit: *Nescio, si a quoquam hominum in hac vita perfecte apprehenditur, ut se scilicet homo diligat tantum propter Deum.* Afferant hoc si qui experti sunt: mihi, fateor, impossibile videtur. Hoc est, nemo tam pure Deum diligere potest, ut in corde suo proprie beatitudinis desiderium extinguat.

Inst. 3. S. Th. 2. 2. q. 23. a. 5. ad 2. *Una sola, inquit, ratio diligendi attenditur principaliter a caritate divina bonitas, quæ est ejus substantia...* Aliæ autem rationes ad diligendum Deum inducentes sunt secundariae, et consequentes ex prima. Ergo ratio qua Deus intuitu beatitatis nostræ dilitur, est motivum saltem secundarium caritatis.

R. N. Cons. Rationes illas secundarias, ait S. Doctor, esse tantum dispositiones, quies ad perfectam dilectionem præparamur: eujusmodi sunt beneficia, præmia sperata, aut pœnae evitandæ, quibus disponimur ad hoc ut in dilectione proficiamus, ut exponit ibidem q. 27. a. 3. In quem sensum antea q. 23. a. 1. et 5. et q. 23. a. 10. *Amicitia caritatis*, inquit, fundatur super communicationem beatitudinis, nimirum tanquam super dispositionem excitantem ac móventem ad caritatem.

Inst. 4. S. Bernardus L. de diligendo Deo c. 1. n. 1. et c. 7. n. 17. (opp. t. 1. p. 584. A. et 591. C.) ait, *ob duplē causam Deum dixerim propter seipsum diligendum: sive quia nihil justius, sive quia nihil fructuosius diligi potest...* Dubitari namque potest quid potissimum dubitetur: utrumnam, quo suo merito Deus, aut certe quo nostro sit commodo diligendus. Ergo.

R. N. Cons. Explicatio data jam est in responsione ad obj. 2. et ad ejus instantiam. Quam doctrinam magis adhuc illustrat Suaresius disp. 1. de objecto materiali et formalis caritatis, ubi ait, S. Thomam 2. 2. q. 23. a. 4. *hoc sensu dixisse, speciale objectum caritatis esse donum divinum*, ut est beatitudinis objectum: *quia Deus ut objectum beatitudinis non amatur propter aliud tanquam propter finem: finis enim ultimus ut sic, non amatur propter alium.* Sive ergo S. Bernardus Deum caritate pura, sive affectu spei diligendum esse pronuntiaverit, ex modo dictis patet, semper propter seipsum diligendum.

## ARTICULUS II.

## DE QUANTITATE CONTRITIONIS.

42. Nota I. Postquam de contritionis essentia disputavimus, juvat nunc ejus quantitatatem expendere. Hæc vel est intensiva ob vehementiam actus ipsius: vel spectatur ratione temporis quo actus durat: vel ad objecta plura sese extendit, prout detestatio debet esse universalis. De quo argumento jam pluribus egimus: nam cum contritio perfecta caritate peccatum debeat extra sacramentum, ut nuper ostensum fuit, atque alias adhuc probabitur: caritatis autem motivum sit vel maxime universale; sequitur plane actum omnem perfectæ contritionis omnibus et singulis peccatis adversari, quod concl. 2. a. 2. cap. præcedent. demonstravimus.

Nota II. Restat nunc demum, ut de intensione et duratione actus, quo ex caritatis motivo peccata detestamus, breviter disseramus. Ubi singularis omnino est Adrianus in 4. q. 2. de pœnit., ad veram contritionem exigens

summam actus intensionem, quam homo conatu omni sibi possibili possit exhibere.

Huic proxime accedit Petrus Sotus, qui lect. 14. et 15. de poenit. docet necessariam esse intensionem maximam, non absolute, sed comparative, ut scilicet poenitens majore voluntatis conatu et ardore feratur in peccati odium et amorem Dei, quam horreat quodvis aliud malum, aut bonum creatum quodlibet diligit. Quod idem videntur putasse S. Bonaventura in 4. d. 16. a. 2. q. 1., Durandus d. 17. q. 4., Richardus a. 1. q. 5. ad 3., et Joannes Morinus de administrat. sacram. Poenit. L. 1. c. 14.

Alii dicuntur maximam quidem detestationis intensionem non exigere, certum tamen gradum, quem Deus solus novit.

*Nota III.* Scotus in 4. d. 14. q. 2. scribit, actum detestationis non habere rationem contritionis, nisi prius tempore aliquo, quod Deus determinavit, duret. Opinionem istam probabilem judicat Jacobus Almainus ibidem. Sed et Cajetanus tom. 1. Opuse. tract. 4. q. 1. ait, Deum aliquando exspectare hujusmodi durationem, priusquam acceptet actum in ratione contritionis, et dispositionis ultimae ad gratiam.

*Nota IV.* Contra hos omnes Theologi passim contritioni perfectae nec certam moram temporis, nec modum intensionis prescribunt, aiuntque ad magnitudinem ipsi debitam sufficere, si detestatio fuerit *appretiative* summa. Nam sicut Deum amore summo appretiative amare, est ipsum diligere super omnia, h. e. plus ipsum diligere, quam quodvis bonum aliud, et creatis rebus omnibus anteferre: ita contritione appretiative summa detestamur peccatum, quando tali amore Dei incensi, peccatum majus et gravius malum aestimamus esse, quam cætera omnia, et præ his omnibus illud magis aversamur, ita ut, data optione, malimus omnia damna et dolores subire, quam peccato consentiendo Deum offendere. Detestatio ista uti ab rationis iudicio oritur, ita in parte animæ superiore potissimum residet, et est dolore intensive magno præstantior: nam intensio detestationis ac doloris major aut minor sepe oritur ex commoda humorum temperie, qua appetitus inferior facilius afficitur ad objectum, quod imaginationi vivacius quandoque occurrit. Secundum hanc explicationem

43. *Dico I.* Ad perfectam contritionem non requiritur certus modus aut gradus intensionis, sed sufficit detestatio peccati summa appretiative, ex caritatis motivo profecta.

*Prob. I.* Dum Christus Matth. 22. v. 37. et Marc. 12. v. 31. recitat præceptum, Deut. 6. v. 5. latum: *Diliges Dominum Deum tuum ex toto corde tuo, et ex tota anima tua, et ex tota fortitudine tua;* sine dubio summam Dei dilectionem requirit: atqui dilectio Dei secundum intensionem summa est impossibilis; cum actus caritatis infusæ versus maximum in intensione non habeat terminum. Igitur tantum præcipitur Dei dilectio summa appretiative, quæ etiam est mensura contritionis.

Neque causari potest Adrianus, requiri tantum contritionis intensionem summam respective, seu intuitu præsentis auxilii gratiae: hoc enim sensu peccator eliciens contritionem intensam ut duo cum auxilio ut duo justificaretur: alias e contra, concipiens dolorem intensum ut quatuor cum auxilio intenso ut quinque, maneret in statu peccati; quod est absurdum.

Eadem difficultas occurrit in opinione Petri Soti et aliorum quorumdam. Nam si detestatio affectus intensione debet excedere præsentem de aliis malis dolorem, evenire potest, ut contritio minus intensa justificet quandoque, cum alias magis intensa non justificaret: quia minus intensa excedere facile potest dolores de malis aliis admodum remissos; dum vicissim intensior contritio crebro ne attingit quidem vehementiam gravissimorum dolorum de malis aliis. Actus enim voluntatis intensio sequitur vehementiam objecti; objectum autem sensibile naturaliter vehementius movet et afficit animos, quam objectum spirituale et non sensibile.

Denique gratis omnino recentiorum quidam certum intensionis gradum ad contritionem extra sacramentum justificantem poscunt. Est enim grave præceptum eliciendi quandoque contritionem: at nullum datur præceptum de re ignota, cuiusmodi sunt contritionis intensæ certi gradus; ergo sine sufficiente ratione exiguntur.

*Prob. II.* S. Scriptura et Patres caritati tribuunt vim justificandi peccatores, quin ullum intensionis gradum adjicient; ut liquet tum ex testimoniis supra adductis, tum Eccli. 3. v. 4. *Qui diligit Deum, exorabit pro peccatis suis, et continebit se ab illis, et in oratione dierum exaudiatur.*

LEO M. epist. 91. ad Theodorum episc. (al. 108. c. 4.) *Misericordia Dei,* inquit, *nec mensuras possumus ponere, nec tempora definire, apud quem nullas patitur moras vera conversio.* S. JOAN. CHRYSOSTOMUS L. 1. n. 6. (opp. t. 1. p. 8. A.) ad Theodorum lapsum. *Brevem poenitentiam et ad modicum exhibitam non abnuit, sed magnam ei mercedem tribuit;* et ibid. D. *Non ex temporis longitudine, sed ex animi affectu poenitentia aestimatur.* S. AUGUSTINUS tract. 9. in Joan. n. 8. *Caritatem,* inquit, *cum habere cuperit (homo), Spiritum sanctum habebit.* Et tract. 5. in epist. Joan. n. 5. ait: *Non discernuntur filii Dei a filiis diaboli, nisi caritate. Qui habent caritatem, nati sunt ex Deo; qui non habent, non sunt nati ex Deo.*

Concilium etiam TRIDENTINUM dum Sess. 14. cap. 4. ait, *contritionem caritate perfectam hominem Deo reconciliare, priusquam sacramentum actu suscipiatur,* disserim utriusque contritionis non ab intensione diversa actuum, sed a solis amborum motivis commonstrat.

*Prob. III.* Caritas habitualis, utcumque remissa, excludit peccatum mortale; ergo etiam caritas actualis. *Consequentia patet ex eo, quod minima caritas plus diligit Deum, quam cupiditas millia auri et argenti,* ut inquit S. THOMAS 3. p. q. 70. a. 4. Sicut enim quecumque aversio a Deo ut sine ultimo, et conversio ad creaturam, etiam in gradu remisso, sufficit ad peccatum mortale et ad jacturam gratiae sanctificantis; ita et quilibet actus dilectionis Dei super omnia peccatum destruit, cui non ratione intensionis opponitur, sed ex natura sua.

Quapropter PIUS V. et GREGORIUS XIII. merito damnarunt Baii propositiones 31. 32. 66. et 68., queis doctor hic Lovaniensis statuit, quod caritas perfecta et sincera, caritas vera, contritio cum caritate perfecta possint extra easum necessitatis aut martyrii sine susceptione sacramenti esse absque remissione criminis. Atqui per caritatem perfectam Baius non intellexit intensam caritatem, sed eam solum qua Deus propter se super omnia diligitur, hoc est, caritatem veram: neque enim negabat, caritatem intensam justificare

extra casum necessitatis et susceptionem sacramenti. Ergo juxta mentem Pontificum, caritas etiam minus intensa, modo vera adhuc, ad justificationem sufficit.

*44. Obj. I.* Peccatum super omnia mala detestari est illud cum malis cæteris conferre : atqui hoc foret admodum periculosum, et dissuadendum infirmioribus ; eo quod objectis præsentibus et corporeis facile moveamur ; ergo non quelibet contritus perfecta detestatur peccatum super omnia mala.

*R. D. M.* Peccatum super omnia mala detestari est illud conferre semper explicite et formaliter, expendendo mala cætera singillatim, aut omnia confuse, et ea pœnate eligendo *N.* est illud conferre saltem implicite et virtualiter cum malis cæteris *C.* Utique formalis comparatio est dissuadenda, ne malorum præsentium imaginatione viva nimium obversante terreatur imbecilli, et ad illa fugienda peccare malint. Quando autem detestamur peccatum ut summum malum, virtualis ad minimum instituitur comparatio ; neque enim voluntas detestari potest peccatum tanquam malum gravissimum, quin illud saltem obiter et implicite comparet cum malis ceteris, quæ peccati intuitu minus atrocia et enormia esse videntur. Modus vero ita detestandi ex perfectæ caritatis motivo habetur : sicut enim ex hoc Deus ut summum bonum, et consequenter super omnia amatur : ita ex eodem peccatum ut summum malum, utpote summo illi bono unice contrarium, aversamur ; ac vi hujus quidem actus voluntas ita disposita manet, ut malit quodvis malum ante pati, quam lethali culpa Deum offendere. Porro quainvis peccator ex animi perversitate bona præsentia et sensibilia quandoque virtualiter preferat omnibus bonis reliquis, ac ipsi quoque Deo, idque ob rationem valde vilem ; depravatio isthæc nihil sententiae nostræ detrahit, sed eam confirmat amplius : inde enim palam fit, Deum amari nunquam posse ex præstantissimo puræ caritatis motivo, quin virtualiter bonis omnibus antefateretur.

*Inst. 1.* Contritus non potest peccatum detestari super omne malum Deo intrinsecum, quale esset perfectionis cuiusdam divinæ destructio ; ergo non potest detestari peccatum super omne malum.

*R. N. supp.* Quod possit malum Deo intrinsecum dari, et comparatio de eo fieri : contritus ergo, cum sit actus proæreoso, non fertur, nisi in objecta possibilia.

*Inst. 2.* Si per contritionem perfectam detestamur peccatum super omne malum ; ergo is, quem gravioris peccati pœnit, ita est affectus, ut malit peccata leviora committere, quod perquam absurde dicitur, cum nullum peccatum sanæ electionis objectum sit.

*R. N. Illat.* Pœnitens ex amore puro Dei detestatur peccatum secundum se super omnia physica mala, et super omnes pœnas sensus et damni, et comparatione saltem virtuali fertur in illa actu etiam prosecutivo eadem præ peccato eligendo, ac dicendo : malum omnia ista potius subire, quam peccando Deum offendere. E contra cum peccata prudenter appeti nequeant, in eorum nullum fertur actu prosecutivo, minus grave præ graviori eligendo ; sed tantum actu aversante magis abhorret graviora, quam minus gravia, cum peccata inter se mutuo comparantur ; eo quod illa sint majus Dei dilecti malum.

*45. Obj. II.* Peccator summe offendit Deum ; ergo, cum contritus sit dispositio proxima ad gratiam, summa illius intensio requiritur.

*R. D. Ant.* Peccator Deum summe offendit, considerata dignitate personæ offendæ *C.* semper cum summo intensionis conatu *N.* Et quamvis hoc fecisset, tamen in dispositione ad gratiam similis intensio detestationis non exigetur : nam cum minima gratia ad remissionem ejusdemculpæ sufficiat, sufficiens quoque et proportionata gratiae dispositio est dolor secundum substantiam et essentiam summus, seu ex puræ caritatis motivo conceptus ; et consequenter erit etiam contritus ista culpe proportionata.

*Inst. 1.* Pœnitens non potest Deo pro peccatis condignum reddere; ergo merito ab ipso exigitur quantum potest ex toto conatu sibi possibili.

*R. D. Cons.* Exigitur quantum potest quoad dolorem ex sua substantia perfectissimum *C.* quantum potest quoad doloris ejusdem intensionem *N.* Intensio hæc summa accidentaria est : nec expediebat salutis viam adeo difficultem reddi.

*Inst. 2.* Ignis licet in minimo gradu essentialiter perfectus, impar tamen est expellendo frigori ; ergo etiam caritas non opponitur peccato, nec illud destruit ratione sua essentiæ, sed ratione gradus duntaxat.

*R. N. Cons.* Actio physica calefaciendi et comburendi fit successive applicando activa passivis : actio vero spiritualis caritatis et virtutum supernaturalium non est successiva, sed instantanea ac indivisibilis.

*Inst. 3.* Quod movet ad appretiationem, movet quoque ad intensionem actus ; ergo contritus non potest esse summa appretiative, et remissa intensive ; nam intensio doloris in voluntate sequitur magnitudinem doloris ex objecti aestimatione.

*R. N. Ant.* Appretiatio oritur ex dignitate et præstantia objecti : intensio vero actus ex magna et vehementi applicatione facultatis ab objectum. Dictum autem est supra, vehementius appetitum nostrum moveri ab objectis sensibilibus, quæ nihilominus ob suam vilitatem honestis et præstantioribus objectis postponimus. Exemplum præbent nobis matres, quæ vehementiore amore feruntur in filios parvulos, licet conservationem vitæ filiorum ætate grandiorum præferant.

*46. Obj. III.* S. Scriptura et Patres requirunt, ut magno conatu enitamus ad contritionem peccatis proportionatam : probant id testimonia art. 1. recitata. Et Michæe 4. v. 10. *Dole et sattage quasi parturiens.* Apoc. 3. v. 16. reprehenduntur tepidi : hi autem sunt qui remisse operantur. S. CYPRIANUS tract. de lapsis, ad finem (opp. p. 178. edit. Parisina, 1666.) *Quam magna,* inquit, *delinquimus ; tam granditer defleamus. Alto vulneri diligens et longa medicina non desit : penitentia criminis minor non sit.* S. CESARIUS Arellensis homil. 1. hæc, inquit, *principalia mala ingenti rugitu et gemitu, et fonte indigent lacrymorum,* etc. In eundem modum scribunt S. AMBROSIUS ad Virginem lapsam c. 8., et L. 2. de pœnit. c. 10, S. AUGUST. serm. 34. c. 12., S. GREGORIUS L. 4. Moral. c. 17., aliisque, quorum sententias coacervat Morinus. His accedit, quod Catechismus Concilii Tridentini part. 2. de Pœnit. n. 46, *ut doloris,* inquit, *acerbitas cum scelerum magnitudine aquari confrérique possit.* Et S. THOMAS in 4. d. 17. q. 2. a. 7. quæstiunc. 3. ait, *dolo-*

rem voluntatis adeo remissum esse posse, ut non sufficiat ad contritionem; ergo.

R. N. Cons. 1º. S. Scriptura et Patres frequenter nos docent, quid fieri deceat: optanda nimurum est et optimam contritionis quoad gradus intensa magnitudo; eaque laudatur in regibus Davide et Manasse, ut in B. Petro alisque pœnitentibus. Nam cum Deus sit summe bonus ac diligendus, peccatum vero maxime detestabile, timeri nullus excessus debet aut in amore Dei, aut in odio peccati.

2º. Eadem S. Scriptura, Patres et Catechismus laudatus indicant, qua ratione peccatum summe appretiative detestari debeamus: ad hoc enim saepe magnus conatus requiritur, ut inclinetur voluntas ad detestandum peccatum, cujus amore tantopere prius exarserat.

3º. Idem Catechismus, Scriptura, et Patres loquuntur ut plurimum de remissione peccati quoad reatum: nam poena temporalis post culpam condonatam residua non remittitur, nisi in hac vita numero et gravitati peccatorum satisfactio adæquetur. Quanquam quæ B. CYPRIANUS modo recitatus scribit, pœnitentiam solemnem, quæ in Ecclesia fieri solebat, concernunt: graviter enim ibidem reprehendit illos, qui crimina sine delectu æqualiter puniebant.

4º. Liber ille ad Virginem lapsam non videtur S. AMBROSIU, nam cap. illo 8. ad finem (opp. p. 315. C. D.): *inhære, inquit, pœnitentiae usque ad extreum vitæ, nec tibi præsumas ab humana die posse veniam dari: quia decipit te, qui hoc tibi polliceri voluerit. Quæ enim proprie in Dominum peccasti, ab ipso solo te convenit in die judicii exspectare remedium.* Que quidem sententia Novatianum errorem continet, contra quem disputat S. AMBROSIUS duobus libris de Pœnitentia. Vide Bellarminum de Script. Eccles.

5º. In Apocalypsi non vocatur tepidus, qui remisse operatur, sed qui mala opera bonis admiscet; ac præsertim qui cum fidem habeat, caritate caret, ut declaravit S. Thomas q. 3. de malo a. 43. ad 1.

6º. S. THOMAS cum S. BONAVENTURA et aliis antiquis, tunc solum, ait, contritionem minus intensam non sufficere ad justificationem, cum destituitur intensione, ut ita dicam, essentiali, objectiva, seu, quod idem valet, appretiativa, quando non est verus et efficax Dei amor, nec inducit ad detestandum peccatum super omnia. Nam ibidem manifeste pro nobis ita concludit: *Quantumcumque sit parvus dolor, dummodo ad contritionis rationem sufficiat, omnem culpam delet.*

Sed et B. AUGUSTINUS dum L. de Natura et Gratia c. 70. n. 84. ait: *Caritas inchoata, justitia est: caritas proiecta, proiecta justitia est; caritas magna, magna justitia est; caritas perfecta, perfecta justitia est;* vult solum, quod qui incipit habere caritatem, incipiat etiam juste vivere; et crescente caritate, justitia vita augeatur. Idem enim AUGUSTINUS caritati simpliciter tali peccatorum remissionem tribuit, ut tract. 5. in epist. Joan. n. 2. *Per dilectionem, inquit, peccata solvuntur.* Et tract. 9. n. 9. *Anima nostra fœda est per iniquitatem; amando Deum pulchra efficitur.*

47. *Dico II.* Detestatio peccati ex motivo caritatis concepta, ut sit contrito perfecta, nulla eget certa temporis duratione.

*Prob. I.* In S. Scriptura Deus pœnitenti justitiam et peccati remissionem

promittit ratione conversionis sue absque ulla mora temporis. Ezech. 18. v. 21. *Si impius egerit pœnitentiam, etc. v. 27. Cum averterit se impius ab impietate sua... ipse animam suam vivificabit.* Et c. 33. v. 12. *In quacumque die conversus fuerit ab impietate sua, etc.* Perinde ac si diceret, eodem momento.

Ex eisdem Prophetæ locis argumentum petitur a contrario: *Cum averterit se justus a justitia sua, et fecerit iniquitatem, morietur in eis.* c. 18. v. 26. *Justus non poterit vivere in justitia sua, in quacumque die peccaverit.* c. 23. v. 42. Hoc est, consensus in peccatum mortale statim ac fit, est peccatum mortale, gratiam destruens; ergo etiam actus contritionis statim ac fit, est vera et perfecta contritio seu ultima ad gratiam dispositio.

Isai. 30. v. 15. dicitur: *Cum ingemueris, tunc salvus eris.* Et quamvis Vulgata latina, proprius ad hebraicum textum accedens, habeat: *Si revertamini, et quiescatis, salvi eritis;* sanctus tamen CYPRIANUS epist. 8. et L. de lapsis circa finem, S. CHRYSOSTOMUS orat. de S. Philogonio, aliquique Patres Latini et Greci, priorem LXX. Interpretum lectionem tenentes, nullam veræ contritioni moram temporis statuunt, quo minus illico Dei gratiam obtineat, quemadmodum ex SS. LEONIS et CHRYSOSTOMI testimoniis nuper intelleximus. Quibus accedunt TERTULLIANUS L. de pœnit. c. 4., HIERONYMUS epist. 46. et 48., PACIANUS epist. 3. ad Sympron., et CÆLESTINUS Papa epist. ad Episcopos provinciæ Viennensis et Narbonensis paucis omnia complectens, Veræ, inquit, *ad Deum conversio... mente potius est estimanda quam tempore,* propheta hoc taliter asserente: *cum conversus ingemueris, tunc salvus eris.* Ecce idem Isaiae testimonium ex vetere Italica versione prolatum, et sensum eundem reddens. Eum nostra Vulgata v. 19. manifeste confirmat his verbis: *Miserebitur tui: ad vocem clamoris tui statim ut audierit, respondebit tibi.*

In quam rem B. AUGUSTINUS Enchiridii c. 65. *In actione pœnitentiae, inquit, non tam consideranda est mensura temporis, quam doloris.*

Nec tantum apud Isajam conditionate illa dicuntur: sed etiam Zachariæ 1. v. 3., Jeremie 13. v. 19., Apocalypsis 3. v. 20. absoluta fit promissio: *Convertimini, et convertar;* ergo hæc duo inseparabiliter sunt conjuncta, quia veritas conditionalis postulat, ut posito antecedente, infallibiliter ponatur consequens: atqui homo convertitur, cum primum peccata per contritionem detestatur; ergo.

*Prob. II.* Ratione. Actus pœnitentiae, qui extra usum sacramenti, tanquam sufficiens dispositio ad remissionem peccatorum, habet gratiam infallibiliter conjunctam, est vera contritio: atqui omnis actus, qui ex sua essentia et motivo est perfecta conversio ad Deum, et aversio a peccato, ejusque detestatio super omnia, habet infallibiliter et sine mora adjunctam gratiam et peccatorum remissionem, ut testimonia hactenus allata ostendunt; ergo omnis talis actus continuo est vera contritio.

*Conf. 1.* Peccator lege naturali et positiva tenetur aliquando Deum super omnia diligere, et ex caritatis hujus motivo peccata sua detestari: at enim certam temporis moram in continuando, aut repetendo hoc actu prescriptam esse nullus docere potest.

*Conf. 2.* Actus fidei et spei supernaturalis sunt veri et perfecti actus virtutum theologiarum, licet non sint admodum intensi et vehementes,

aut prolixo, dummodo ex motivo sibi proprio concipientur; ergo etiam actus caritatis ex motivo proprio conceptus, vere erit actus virtutis theologicae; et detestatio peccati ex ejusdem motivo profecta, erit vera contrito, quin certa intensio, aut prolixitas ad pias hasce affectiones requiratur.

*Conf. 3.* Posset homo in fine vitae detestari peccatum ex motivo caritatis perfectae, quin ei supersit tanta mora temporis, quantum Scotus exigit, ut ille actus sit contrito; adeoque peccator in eum posset statum redigi, in quo per verum pœnitentia actum peccati remissionem consequi non posset: consequens autem hoc damnatur ut erroneum a Gennadio Massiliensi, in libro de Ecclesiast. dogmatib. c. 80. (Patrolog. t. 58. p. 998. D.). Idemque refert ex Concilio Moguntino cap. 2. Ivo in suo decreto, part. 15. c. 32.

*48. Obj.* Actus contritionis est dispositio ad gratiam: atqui dispositio debet antecedere formam; ergo contrito aliqua saltem temporis duratione eget.

*R. D. M.* Contrito est dispositio ad gratiam qualiscumque *N.* est dispositio ad gratiam perfecta et ultima *C.* Hujusmodi dispositio non antecedit formam tempore, sed natura.

Nec paulo magis probat alterum Scotti argumentum, quod contrito debet perfici usque ad certam intensiōnē: nam præterquam quod nulla certa ad actum contritionis requiritur intensio; ut ex hactenus dictis palam sit: intensio ista si requereretur, posset in instanti perfici in actu immānente, ut in qualibet forma, quæ sine resistentia contrarii producitur. Ex his quæ hucusque disputavimus

*49. Colliges 1º.* Contritione nos magis detestari peccata graviora quam leviora: in peccatis enim gravioribus magis appetit ratio motiva, puta malum Dei; unde majus odium et dolorem ac detestationem in nobis excitant.

*2º.* Propria item peccata magis detestamur, quam aliena: nam quia cuius homini speciatim injunctum sit, Deum ex toto corde amare, amori huic peccata propria vel maxime adversantur. Quam ob rem magis aversamur peccatum veniale a nobis commissum vel committendum, quam peccatum originale: per peccatum enim veniale homo actu proprio facit, ut Deo non nihil displiceat, eique mali aliquid inferat; cum e contra originali peccato incurrit tantum et patiatur malum, nec se ipsum a Deo avertat, sed ipse voluntaria avertatur a Deo. Hinc etiam magis detestandum peccatum nostrum veniale actuale, quam mortale habituale: per hoc enim toleramus malum a Deo nobis illatum; cum e contra per illud novum Deo malum inferamus.

Nec refert, quod peccata aliena gravia sint majores Dei offendit, quam nostra levia: ordinata enim erga Deum caritas præcipit, ut, antequam de aliis cogitemus, ipsi prius maximum illud præceptum implere satagamus; præsertim negativum, magis absolutum a tempore, loco, aliisque circumstantiis, ut ne quid adversus Deum committamus. Quapropter licet S. Thomas recte probet, B. Virginem Mariam in utero matris sanctificatam fuisse, quia majus est privilegium, immunem a peccato originali esse, quam a peccato veniali: ob hoc tamen privilegium non oportebat ut eadem B. Virgo minus

detestaretur, voluntate propria vel tantisper averti a Deo per peccatum veniale, quam aliena voluntate per originale peccatum, quod nobis tantum est proprium moraliter: caritas enim non tam commoda propria, quam Dei bonum intendit.

*3º.* In contritione excedi dupliciter potest, sed tantum per accidens. Ac primo quidem quando quis falso sibi persuadet, peccatum tam grande malum esse, ut ejus remissionem obtainere nequeat. Hunc nimium dolorem antevertit Apostolus 2. Cor. 2. v. 7. scribens: *Ne forte abundantiori tristitia absorbeatur qui ejusmodi est.* Quanquam actus ex errore illo profectus pœnitentia proprie dici non possit.

Altero modo exceditur, si ex nimio voluntatis conatu valetudo graviter lèdatur. Ubi Richardo, in 4. d. 17. a. 1. q. 8. dicenti, non teneri pœnitentem ad capitī contentionem remittendam, si noxia prævisa non fuerit, assentiri non possumus. Sufficit enim damnum prævisum fuisse: quia præcepto naturali tenemur ita moderari nostro fervori, ut ne quid gravioris detrimenti salus corporis patiatur; maxime quando id ad animæ salutem opus non est, ut in casu præsenti accidit. Atque ideo sapienter Chrysostomus hom. 4. in 2. ad Corinth., et ad naturam et ad conditionem peccatorum pœnitentia labores monet esse temperandos.

## ARTICULUS III.

## AN AD CONTRITIONEM PERFECTAM STATIM REMITTANTUR PECCATA?

*Nota I.* Lutherus tradidit, neminem per contritionem Deo reconciliari, sive ante sacramenti Pœnitentiae susceptionem, sive in ipso sacramento Pœnitentiae: nam in assertione articuli 6. ex sermone de Pœnitentia, *ego, inquit, peccatum assero, quidquid ante gratiam fit in homine, tantum abest, ut præparet ad gratiam.* Ait autem, contritionem esse effectum justificationis, quæ prius habita sit per fidem, qua certo sibi persuadet, remissa sibi per Christum esse peccata.

*Nota II.* Ex Catholicis vero Theologis Baius, Jansenius, Estius, Gaspar Jueniu, aliquie Novatores appellant caritatem imperfectam, si quis actu remisso Deum propter se ac super omnia diligit, neque putant contritionem ex caritate hac imperfecta conceptam sufficere ad remissionem peccatorum ante susceptum Pœnitentiae aut Baptismi sacramentum, nisi in casu necessitatis: sed opus esse contritione perfecta, hoc est, ea quæ ex caritate Dei admodum intensa proficiscatur.

*50. Dico.* Qualiscumque contrito, quæ propter Deum super omnia dilectum concepit, continuo justificat pœnitentes, etiam ante usum sacramenti. Hæc est communis sententia Doctorum Catholicorum, qui contrariam opinionem gravissimis censuris proscribunt.

*Prob.* S. Scriptura simpliciter promittit gratiam Dei, et justificationem puræ caritati Dei, et peccatoribus vere ad Deum ex toto corde conversis, ut constat ex testimonis art. proxime præcedente adductis: atqui contrito quævis propter Deum super omnia propter se delictum, est pura Dei caritas